

08/07/2002

## Deklarasi Mahasiswa Pasca Mahathir

KUALA LUMPUR, Ahad - Persatuan pelajar institusi pengajian tinggi tempatan dijemput menandatangani Deklarasi Mahasiswa Pasca Mahathir sebagai tanda sokongan terhadap peralihan kuasa daripada kepimpinan Datuk Seri Dr Mahathir Mohamad kepada Datuk Seri Abdullah Ahmad Badawi.

Pengerusi Unit Pendidikan Politik-Institut Kajian Dasar (UPP-IKD), Hamdi Mokhtar, dalam satu kenyataannya berkata deklarasinya itu akan menunjukkan aspirasi dan kehendak mahasiswa pada zaman pasca Dr Mahathir.

"Seandainya Abdullah atau sesiapa saja mengisi tampuk pemerintahan negara apabila Dr Mahathir meletak jawatan nanti, beliau harus memperjuangkan Malaysia baru yang lebih baik.

"Maka dengan harapan dan aspirasi kami, mahasiswa Malaysia dikumpulkan menerusi Deklarasi Mahasiswa Pasca Mahathir ini dan menjadi harapan supaya semua pihak memandang serius perkara ini," katanya.

Hamdi berkata, pihaknya menjemput pertubuhan pelajar lain tampil dan menyokong deklarasinya itu untuk memperkasakan suara mahasiswa.

Antara organisasi yang sudah menandatangani deklarasinya itu setakat ini ialah Persatuan Kebangsaan Pelajar Islam Malaysia (PKPIM), Majlis Perwakilan Pelajar Universiti Islam Antarabangsa (MPP-UIA), Persatuan Mahasiswa Universiti Kebangsaan Malaysia (PMUKM), Majlis Perwakilan Mahasiswa Universiti Malaya (MPMUM); Majlis Perwakilan Pelajar Universiti Putra Malaysia (MPP-UPM), Majlis Perwakilan Pelajar Universiti Sains Malaysia (MPP-USM) dan UPP-IKD.